

Малайзияда 65-халқаро Қуръон мусобақаси бўлиб ўтади



14:30 / 17.07.2025 1112

Малайзия пойтахти Куала Лумпур кейинги ойда ҳифз ва тиловат йўналиши бўйича 65-халқаро Қуръон мусобақасига мезбонлик қилади. Бу ҳақда «Бернама» ахборот агентлиги хабар беради. Мусобақада 50 давлатдан 72 нафар иштирокчи қатнашади. Ушбу халқаро мусобақа «Маданий уммат сари (Мадани)» шиори остида Жаҳон савдо маркази (WTCKL)да ўтказилади.

Расмий тадбирни Малайзия Бош вазири Анвар Иброҳим 2 август куни очиб беради.

«40 нафар иштирокчи тиловат йўналишида, 32 нафари эса ҳифз йўналишида беллашади», дея таъкидлайди Бош вазир девони ҳузуридаги диний ишлар вазири, доктор Муҳаммад Наъим Мухтор. Унинг айтишича, мусобақа иштирокчилари шу йилнинг 19-23 май кунлари бўлиб ўтган онлайн мусобақа танлови босқичида саралаб олинган. Ғолиблар тажрибали ҳакамлар ҳайъати аъзолари томонидан баҳоланиб, жараён адолатли тарзда ўтказилган.

Мусобақа иштирокчиларини Малайзия, Саудия Арабистони, Миср, Иордания ва индонезиялик 16 нафар ҳакамлар ҳайъати аъзолари баҳолаб боришади.

Тиловат йўналиши бўйича баҳолаш мезонлари:

- тажвид;
- оҳанг (тараннум);
- фасоҳат (равонлиги);
- овоз сифати.

Ҳифз йўналиши бўйича:

- ёд олиш аниқлиги;
- тиловат равонлиги.

Мусобақа ғолиблари қуйидаги совринларни қўлга киритади:

1-ўрин ғолиби 40 минг ринггит миқдорида пул мукофоти;

2-ўрин 30 минг ринггит;

3-ўринга эса 20 минг ринггит пул мукофоти берилади. Шунингдек, ғолибларга YAREIM жамғармаси томонидан заргарлик буюмлари ҳам ҳадя қилинади.

Малайзия ушбу халқаро мусобақани 1961 йилдан буён ташкил этиб келаётган илғор давлатлардан бири ҳисобланади. 2016 йилда эса мамлакат Кувайт давлати томонидан «Энг яхши Қуръон дастури» мукофотига сазовор бўлган.